

■ COLUMNA

Scola en temps da corona

DA CHATRINA JOSTY*

Ina vita senza scola fiss pussaivla. Ma betg per magistras e magisters che fan lur mister cun corp ed olma.

Corona è qua ed ins ha dad esser pragmatic. Nus essan uschè pragmatics qua a Köniz, sin mes stgallim da la 3. e 4. classa, che nus mettain ad ir l'infrastructura tecnica per collavurar sur la rait cun nossas scolaras e scolars.

En sasez avessan las scolas gì temp da far quai. En sasez pudess l'infrastructura esser meglra. En sasez pudess mintga scolar avair in tablet u in laptop sco en auters lieus. A Berna è quai pli cumplitgà. Cuntunt perquai che bleras vischnancas n'han betg ils meds finansials.

Nus gidain uss dentant a spargnar blers raps per curs da computer. Cun la grond'iniziativa dad in collega da lavur mettain nus ad ir durant ils emprims dus dis che la scola è serrada «Microsoft Teams», senz'avair grond'idea dal program. Mo tant: Mintga scolar ha access e po far ses pensums directamain on-



line. Nus magistras pudain curreger directamain e dar resuns sur la funcziun da chat.

La prestaziun da noss team è extraordinaria. Quella che sa in pauet dapli che tschels, gida als auters e dat vinavant ses savoir – en tut il quartier. Las dumondas dals geniturs vengnan numnadamain immediat sunter che nus avain dà ora l'access al programm. – «Co va quai cun il login?» – «Qua s'avra adina uschè ina fanestra. Tge stoss jau far?»

Tut en ina giada n'essan nus betg pli scolastas, mabain expertas da computer e schliain problems da computer al telefon. Sunter paucas uras funcziuni però per tuts senza problems pli gronds. Ils uffants ed ils geniturs èn intgantats

e fitg cuntents. Nus essan motivads e impromettain da metter a disposiziun anc dapli ed anc meglier material. Nus faschain uss homeoffice e guardain mintgament tge ch'ils scolars fan online. Han els gia fatg il pensum da franzos? Han els gia scrit il text da tudestg? È X. sutdumandà cun il pensum da matematica? Dovra Y. insatge sin ses nivel da tudestg? Tge èsi cun gimnastica e cun disegns? Nus stuain era dar pensums per quels roms! Els duain era survegnir ideas per zambergiar e per avair moviment!

Idaventa insaco adina pli isteric ed adina pli spert. Stuain nus uss reagir sin mintga moviment online da noss scolars? Stuain nus responder mintga messadi da nossas collegas?

Igl è sonda saira ed il chat da team sin whatsapp mussa 13 novas novitads cun propostas tge ch'ins pudess anc dar als scolars.

Jau stoss responder: La pausa. Quella stuess ins era anc dar. E la fin d'emna libra.

***Chatrina Josty è anteriura moderatura e redactura dal «Telesguard». Ella abitescha a Köniz sper Berna e lava sco magistra ed autura.**